

Sukan untuk kesihatan, bukan cari lawan - Dr. Mahathir

KUALA KANGSAR 8 Ogos - Datuk Sri Dr. Mahathir Mohamad semalam menegaskan kegiatan sukan adalah satu cara untuk memberikan kesihatan, tetapi bukan mencari lawan atau peperangan.

Bersukan, tambah beliau, adalah untuk mencari kawan dan ianya akan melibatkan semua orang.

Kata beliau, pertandingan sukan bukanlah untuk mereka yang gagah-gagah saja, tetapi sepatutnya melibatkan semua peringkat.

Berucap melancarkan pesta sukan tiga hari Pergerakan Pemuda UMNO Malaysia di padang Kolej Melayu di sini semalam, Perdana Menteri mengajak rakyat negeri ini melibatkan diri dalam sukan sekurang-kurangnya lima belas minit sehari untuk kesihatan mereka.

Kata beliau, rakyat boleh melakukannya tanpa keluar dari rumah yang akan memberi kebaikan kepada mereka, sekalipun mereka bukanlah orang suka atau peminatnya.

Beliau juga menyebut adalah tidak patut kiranya sukan dipertandingkan, hingga menimbulkan pergaduhan dan sepatutnya tiap pertandingan akan diadakan secara persahabatan, berdasarkan kehenyutan dan semangat sukan sendiri.

Beliau berkata, biarlah kalah dalam pertandingan sukan, tetapi ia akan memberi galakan dalam mengeratkan persahabatan antara orang-orang sukan itu.

Perdana Menteri menyatakan yakin betapa sukan negara akan lebih berkemajuan lagi di masa akan datang, tetapi mengingatkan biarlah pertandingan-pertandingan sukan di negara ini berlangsung dalam semangat kesukanan yang dikehendaki.

Datuk Sri Dr. Mahathir sebelum ini telah menimbulkan gelak ketawa bila beliau menyebut alangkah baiknya jika pertandingan sukan itu diadakan antara UMNO dengan PAS.

"Kalau pertandingan demikian diadakan sudah tentu UMNO akan memukul mati pasukan PAS", disambut dengan gelak ketawa oleh lebih 1,000 hadirin di upacara itu.

Beliau gembira Pergerakan Pemuda UMNO juga mempunyai masa untuk bersukan sekalipun mempunyai tugas perjuangan yang luas.

Ini kata beliau merupakan suatu yang menjadi harapan rakyat, kerana kemajuan mereka bukanlah untuk melihatkan mereka petah bercakap, tetapi juga untuk meletakkan mereka, "tahan lasak."

Ketibaan Presiden UMNO itu telah disambut oleh Ketua Pergerakan Pemuda UMNO Malaysia, Datuk Haji Suhaimi bin Datuk Haji Kamaruddin, pengerusi pesta sukan, Encik Zainal Abidin Zin dan ahli-ahli Exco Pergerakan Pemuda UMNO yang lain.